

Allannguutissatut siunnersuut

uunga

Uunga siunnersuut: Inissianik attartortitsisarneq pillugu Inatsisartut peqqussutaata allanngortinneqarnissaa pillugu Inatsisartut inatsisaat nr. xx, xx. xxx 2019-imeersoq (Pisortat inissiaataanni uumasuuteqarnissamut tunngatillugu maleruagassat allanngortinneqarnerat aamma attartortup toqkkut qimagunnerani il.il. attartukkap tiguneqartarnera pillugu) Aappassaanneerinissamut Naalakkersuisunit saqqummiunneqartoq

§ 1

1. § 60 imatut oqaasertalerneqassaaq:

” § 60. Attartortup toqunerani aappaasoq, aappaasutut nalunaarsorsimasoq imaluunniit inooqataasoq, maannamut atugassarititaasut naapertorlugit attartortunngornissamut pisinnaatitaaffeqarpoq. Inuk, attartortup aappariinnermut assingusumik inooqatigisaa inooqataasutut isigineqarpoq. Taamatuttaaq inuk, attartornermut isumaqatigiisummut atsioqataanngitsoq, kisiannili sivikinnerpaamik qaammatini arfinilinni attartortumut inoqutaasutut najugaqateqartoq inuillu allattorsimaffianni nalunaarsorsimasoq pisinnaatitaaffeqarpoq, taamaattorli tak. § 63, imm. 3.

Imm. 2. Taamatuttaaq imm. 1 attartortup qitornaanut 18-it sinnerlugit ukiulinnut atuutissaaq. Qitornaq illoqarfimmi allami ilinniakkaminik naammassinnereerluni imaluunniit unitsitsererluni attartukkami najugaqartutut inuit allattorsimaffiannut nalunaarsorneqarpat, piffissaq ilinniartuusoq imm. 1 naapertorlugu naatsorsuinnermut ilanngunneqassaaq. Qitornat angerlarsimaffimmi najugaqartut arlallit attartortunngornissamik kissaateqarpata, qitornaq, attartortup toqunissaa sioqqullugu sivisunerpaamik attartortumut inoqutaasutut najugaqateqarsimasoq inuillu allattorsimaffianni nalunaarsorsimasoq salliutinneqassaaq.

Imm. 3. Sulisunut inissiaq, attartortup pisortani sulisitsisuni atorfeqarnera aqqutigalugu innersuunneqarsimasoq tassani pineqarpat, attartortumut aappaasoq, aappaasutut nalunaarsorsimasoq, inooqataasoq inuillu allat imm. 1-imi taaneqartut attartornermut atugassarititaasut nalinginnaasut naapertorlugit inissiamut innersuunneqarnissamut pisinnaatitaapput, taamaattorli tak. § 63, imm. 2-3. Attartortumut aappaasup, aappaatut nalunaarsorsimasup, inooqataasup, inuillu allat, imm. 1-imi taaneqartut namminneerlutik pisortani sulisitsisumi atorfeqarnertik aqqutigalugu sulisunut inissiamut innersuunneqarnissamut pisinnaatitaaffeqannginnissaat piumasarineqarpoq.

Imm. 4. Attartortoq ukioqqortussutsini imaluunniit napparsimanini pissutigalugu utoqqaat illuannut assigisaanulluunniit nuuppat, imm. 1-3-imi aalajangersakkat taamaaqataanik atuutissapput.

Siunnersuummut nassuiaatit

UKA2019/27

IAN suliaq normu 2019-2647

Nassuiaatit nalinginnaasut

Allannguutissatut siunnersuut allannguutissatut siunnersuutip aappassanneerseqarnissaanut Sanaartornermut Ataatsimiititaliap isumaliutissiissutaa tunngavigalugu saqqummiunneqarpoq.

Allannguutissatut siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Imm. 1-imut

Aalajangersakkami aappaasup, aappatut nalunaarsorsimasup inooqataasulluunniit toqkkut qimaguttup attartugaanik nangitsisinaanera tiguisinnaaneralu maleruagassiuunneqarpoq. Aappaasup, aappatut nalunaarsorsimasup inooqataasulluunniit attartortup toqunissaa sioqqullugu qaammatini arfinilinni kingullerni attartortumut inoqutaasutut najugaqateqarsimanissaa inuillu allattorsimaffianni nalunaarsorsimanissaa piumasarineqarpoq.

Inuit katissimasut, aappariittut nalunaarsorsimasut inooqatigiilluunniit aammalu inissiami attartortittakkami najugaqatigiittut ataatsimoorlutik inoqutigiissimassasut nalinginnaasumik naatsorsuutigineqartariaqarpoq. Tamatumunnga naliliinermi ilaatigut attartortup aamma aappaasup, aappatut nalunaarsorsimasup imaluunniit inooqatigisap attartortittakkamik ataatsimoorlutik atuisuunerat aammalu ataatsimoorlutik angerlarsimaffimmik ingerlatsinerat pingaartinneqarsinnaavoq.

Aamma attartortup inooqataasullu aappariinnermut assingusumik inooqatigiissimanissaat piumasarineqarpoq. Angerlarsimaffimmi ataatsimoorluni ingerlatsisoqarsimappat aammalu kalaallit inatsisaat malillugit ataatsimut isigalugu aappariinnermik kinguneqarsinnaasumik inooqatigiittoqarpat inooqatigiinneq aappariinnermut assingusimassaaq. Assersuutigalugu siumut utimullu eqqarleriit imaluunniit qatanngutigii inooqatigiippata, tamanna aappariinnermut assingusumik inooqatigiinnerussanngilaq.

Pineqartut ataatsimoorlutik angerlarsimaffimmik ingerlatsinersut naliliinermi, pineqartut imminnut attaveqatigiinnerminni iluaqutissartaqartitsinersut pingaartinneqarsinnaavoq. Iluaqutissartaasut ataatsimut isigalugit katissimasut aamma inuit aappariittut nalunaarsorsimasut iluaqutissartaqartitsisarnerannut sanilliunneqarsinnaanersut, naliliinermi aalajangiisuusumik pingaaruteqarpoq.

Iluaqutissartaasut aningaasaqarnermut tunngassuteqarsinnaapput, aningaasartuutitik aalajangersimasunik aamma ulluinnarni atuinnermut aningaasartuutitik akiliisarnermut atatillugu,

UKA2019/27

IAN suliaq normu 2019-2647

imaluunniit aningaasaqarnermut tunngassuteqaratik, ulluinnarni suliassani ikioqatigiinnertut iluseqarsinnaapput, soorlu meeqqanik aallerneq, aassineq paarsinerlu, pisiniarneq, nerisassiorneq eqqiaanerlu il.il.

Attartortoq inissiami attartortittakkami nalinginnaasumiissimappat, aappaasoq, aappatut nalunaarsorsimasoq inooqataasorluunniit qimagaasoq maannamut atugassarititaasut tunngavigalugit attartukkamik ingerlatsiinnarnissamut pisinnaatitaavoq. Aappaasup, aappatut nalunaarsorsimasup inooqataasulluunniit qimagaasup attartornissamut isumaqatigiissut malillugu pisinnaatitaaffiit pisussaaffiillu tigussavai.

Pisortat inissiaataanni attartortittakkani aappaasup, aappaasup nalunaarsorsimasup imaluunniit inooqataasup qimagaasup attartortittakkamik tiguserani inoqutigiit amerlassusissaannut tunngatillugu inissiap naammattumik angissuseqarnissaanut piunasaqaateqartoqanngilaq. Assersuutigalugu aappaasup qimagaasup inissiaq nalinginnaasumik attartortittagaq sisamanik initalik attartukkami kisimiittussaagaluaruniluunniit tigusernaavaa.

Inissiaq attartortittagaq immikkut ittumik ilusiligaappat, aammalu attartortup innarluuteqarnera pequtugalugu inissiaq tunniunneqarsimappat, attartugaq tiguserannaanngilaq. Taamatut pisoqassappat, attartortitsisarnermut peqqussummi § 5-imi innersuussisarnermut maleruagassat nalinginnaasut malillugit inissiamik attartortittakkamik nalinginnaasumik tunniussisoqarsinnaavoq.

Imm. 2-mut

Aalajangersakkami attartortup qitornaasa angerlarsimaffimmi najugaqartut 18-it sinnerlugit ukiullit toqusup attartugaanik nangitsinissamut tiguserinissamullu pisinnaatitaaffeqarnerat maleruagassiuunneqarpoq. Qitornaasup qaammatini arfinilinni attartortumut inoqutaasutut najugaqateqarsimanissaa inuillu allattorsimaffianni nalunaarsorsimanissaa piunasaqaatigineqarpoq.

Attartortup taassumalu qitornaasa angerlarsimaffimmi najugaqartut inoqutigiissimanissaat naatsorsuutigineqartariaqarpoq. Tamatumunnga naliliinermi ilaatigut attartortup aamma qitornat angerlarsimaffimmi najugaqartut attartortittakkamik ataatsimoorlutik atuisuunerat aammalu ataatsimoorlutik angerlarsimaffimmik ingerlatsinerat pingaartinneqarsinnaavoq.

Attartortoq inissiami attartortittakkami nalinginnaasumik attartortuusimappat, qitornap maannamut piunasaqaatit malillugit attartornermik nangitsinissaq pisinnaatitaaffigaa. Qitornap attartornermi isumaqatigiissummi pioreersumi pisinnaatitaaffiit pisussaaffiillu tigussavai.

Pisortat inissiaataanni attartortittakkami qitornap attartortittakkamik tiguserani inoqutigiit amerlassusissaannut tunngatillugu inissiap naammattumik angissuseqarnissaanut piunasaqaateqartoqanngilaq. Assersuutigalugu qitornap inissiaq nalinginnaasumik attartortittagaq sisamanik initalik attartukkami kisimiittussaagaluaruniluunniit tigusernaavaa.

UKA2019/27

IAN suliaq normu 2019-2647

Attartortoq angerlarsimaffimmi najugalinnik, attartukkamik tigusinissamik kissaateqartunik arlalinnik qitornaqarpat, qitornat akornanni toqqaasoqartariaqarpoq. Pisinnaatitaaffiup qitornamut attartortup toqunissaa sioqqullugu sivisunerpaamik attartortumut inoqutaasimasumut aammalu inuit allattorsimaffianni nalunaarsorsimasumut tunniunneqartarnissaa siunnersuutigineqarpoq.

Inissiaq attartortittagaq immikkut ittumik ilusiligaappat, aammalu attartortup innarluuteqarnera pequtugalugu inissiaq tunniunneqarsimappat, attartugaq tiguneqarsinnaanngilaq. Taamatut pisoqassappat, attartortitsisarnermut peqqussummi § 5-imi innersuussisarnermut maleruagassat nalinginnaasut malillugit inissiamik attartortittakkamik nalinginnaasumik tunniussisoqarsinnaavoq.

Imm. 3-mut

Aalajangersakkami sulisunut inissiamik, attartortup pisortani sulisitsisumi atorfeqarneranut atatillugu innersuunneqarsimasumik inissiatut attartortittakkatut nalinginnaasutut tigusinnaanermut pisinnaatitaaffiit aalajangersarneqarput. Siunnersuummi imm. 1-2-mi piumasagaatit nalinginnaasut allannguuteqaratik atorfeqassapput.

Sulisunut inissiaq, attartortup sulisitsisumi namminersortumi atorfeqarneranut atatillugu innersuunneqarsimasooq aalajangersakkamut pineqartunut ilaatinneqanngilaq. Kisiannili attartortitsisarnermut peqqussummi § 65 naapertorlugu, atorfeqarnerup uninnerani attartorneq atorunnaartussaavoq. Aappaasoq, aappaasutut nalunaarsorsimasooq, inooqataasoq imaluunniit qitornat angerlarsimaffimmi najugaqartut 18-it sinnerlugit ukiullit, sulisunut inissiamut namminersortumi sulisitsisumi atorfeqarneq aqutugalugu innersuunneqarsimasumut, inissiatut attartortittakkatut nalinginnaasutut innersuunneqarnissamut pisinnaatitaanngillat.

Aammattaq pisortani sulisunut inissiap inissiatut attartortittakkatut nalinginnaasutut tigusinnaanut aappaasup, aappaasutut nalunaarsorsimasup, inooqatigisap imaluunniit qitornat angerlarsimaffimmi najugaqartut 18-it sinnerlugit ukiullit pisortani sulisitsisumi atorfeqarneq aqutugalugu namminnerlutik sulisunut inissiamut innersuunneqarnissamut pisinnaatitaassanngitsut piumasagaataavoq.

Inissiaq attartortittagaq atorfimmuut aalajangersimasumut immikkut atugassiisutaappat, sulisunut inissiaq inissiatut attartortittakkatut nalinginnaasutut tiguneqarsinnaanngilaq. Taamatut pisoqassappat, attartortitsisarnermut peqqussummi § 5-imi innersuussisarnermut maleruagassat nalinginnaasut malillugit inissiamik attartortittakkamik nalinginnaasumik tunniussisoqarsinnaavoq.

Sulisunut inissiaq attartortittagaq immikkut ittumik ilusiligaappat, aammalu attartortup innarluuteqarnera pequtugalugu inissiaq tunniunneqarsimappat, attartugaq tiguneqarsinnaanngilaq. Taamatut pisoqassappat, attartortitsisarnermut peqqussummi § 5-imi innersuussisarnermut maleruagassat nalinginnaasut malillugit inissiamik attartortittakkamik nalinginnaasumik tunniussisoqarsinnaavoq.

UKA2019/27

IAN suliaq normu 2019-2647

Imm. 4-mut

Attartortup ukioqqortussuseq imaluunniit napparsimaneq peqqutigalugit inissiaq qimallugu ataavartussamik utoqqaat illuannut assigisaanulluunniit nuunna, attartortup toquneranut sanilliuqqassaaq. Taamaattoqassappat attartortup aappaa, aappaatut nalunaarsorsimasoq, inooqataa imaluunniit qitornai 18-it sinnerlugit ukiullit allalluunniit assigiimmik inissiamik inissiatut attartortittakkatut nalinginnaasutut tigusinissaq imaluunniit sulisunut inissiamik inissiatut attartortittakkatut nalinginnaasutut tigusinissamik innersuunneqarnissaq pisariaqartittussaavaat.

Attartortup inissiami attartortittakkami imaluunniit sulisunut inissiami aalajangersimasumik najugaqarnermik qaqugukkut ataavartussamik taamaatitsinersoq immikkut naliliiffiqeqassaaq, aammalu attartukkap attartortup aappaanut, aappaatut nalunaarsorsimasumut, inooqataanut imaluunniit qitornaanut angerlarsimaffimmi najugaqartunut 18-it sinnerlugit ukiulinnut allanulluunniit tunniunneqarnissaata attartortumit allaganngorlugu akuerineqarnissaa tamatumunnga pisariaqartussaavoq.